

Un rat'i ora cu Tanta Dora



Conbai muchanan?

Vakantie ta tras di lomba y aña nobo di scol a cuminsa. Mi ta desea boso un bon aña escolar y cu hopi energia pa boso por cab'é cu exito. Hopi pasenshi y perseverancia pa boso logra boso meta, haci boso best y cu yudansa di Papa Dios y di boso mayornan sigur boso lo logra. Na e maestro y maestranan mi ta desea



nan hopi forza y sabiduria, boso tarea ta difícil, pero tambe mashá bunita.

Muchanan, nos tur conoce e mata di watapana, su flor ta hole masha dushi mes, su fruta ora e seca, nos grandinan den nan tempo, ta piki nan pa manda exterior y aya nan ta traha un sorto di likido di e fruta, cual nan ta usa pa curti cuero y traha articulo di cuero. E fruta ey ta manchña mescos cu e azeta di aloë.

Aloë tambe tabata un producto cu nos tabata exporta prome cu Lago a bin Aruba. Nos tabata usa loke nos tera ta produci.

Por ehempel pa laba tayo ta bai busca walishali den mondi, esaki ta un mata yen di foyo. Ora e weyanan ta preto di chemené (roet), ta frega nan cu santo di rooi. Esaki pasobra ora awa yobe ta keda den e rooinan un santo hopi fini.

Nos tabata tin hopi mata di calbas, tin calbas shimaron, esey ta un calbas chikito y rondó, y ta us'é pa traha maraca.

Esun oval nos tabata us'é pa traha bangaña. Bangaña ta wordo usa pa pone e fichanan aden ora ta hunga bingo, pero tambe pa pone awa pa bebe aden, y hink'é den e muchila pa e hendenan cu ta bai corta aloë of bai chapi den cunucu. E ta tene e awa masha fresco mes. Muchila ta un tas cu ta cosí di un tela masha duro mes yamá lona. Eyden ta pone cuminda pa hiba trabao. E tin strep pa pas'é na schouder y ta hopi pan batí cu pisca hasá, yorki (carni hasá) ta bai aden, webo herbí. Nos grandinan cu ta traha duro den cunucu no ta come pan blanco di panaderia. E pan ta traha na cas, y ta ser yamá dompi.

E mondongo di calbas di su uso. Ta traha stropi di calbas cu ta bon pa griep y tambe ta baña cachó cu'ne. E ta mata carpata y purga.

Tin un calbas grandi y rondó, e mata no ta crece bai laira manera e otronan, pero e ta rama abao, pasobra su fruta ta hopi grandi y pisá.

Ta corta e calbas na mitar y e ta wordo usa pa dja-dja maishi rabo. Dja-dja ta wordo haci den e forma aki, bo ta draai e calbas rond den bo man y e maishi ta wordo separá for di e dacoco. Dacoco ta e flishi color preto cu ta proteha e maishi. Tambe ta us'é pa bati webo ora di traha bolo.

E webo ta rende y subi masha hopi mes. Awor tin mixer, pero antes ta na man ta bati e webo cu un batidó of cu un forki grandi.


Muchanan esaki ta tur pa awor. Mi ta desea boso tur cos bon, y te otro luna cu poder di Dios...

Tanta Dora



Chabalito

Number 1 - Año VII - Afl. 2,=



BIBLIOTECA NACIONAL ARUBA



3 0993 00276 876 0